

«Alpenrauschen» – in crimi ladin-turitgais

DA CLAUDIA CADRUVI / ANR

■ **La schurnalista Flurina Filli turna en l'Engiadina. Ella fa retschertgas e vul savoir pertge che la politicra verda Franziska Padrun ha stuì murir. Ma Filli chatta era misteris ord sia atgna uffanza.** Il crimi «Alpenrauschen» è gist ord stampa e cumpara l'emna proxima en las librerias. L'autura *Sabina Altermatt* ha publictà il 2005 l'emprim roman criminal «Verrat in Zürich West». Era quest crimi aveva in connex grischun, numnadain cun Versomi en Surselva. Il nov cudesch è già il terz crimi dad Altermatt. L'istorgia cumenza a Turitg e sa splega suenter cunzunt en l'Engiadina Bassa. Las vischnancas ladinhas portan nums sco Sursass, Nival, Spera, Flaun e Guardaval. Tenor las descripziuns sa tracti probabel da Scuol, Lavin, Tarasp, Ftan e Guarda.

Politicra verda sa disgraziescha

Franziska Padrun è cussegliera naziunala ed enconuschenta per ses engaschament curaschus. Ina notg – ella banduna gist il studio da televisiun nua ch'ella ha dà in'intervista – vegn Padrun sut in auto. Flurina Filli, schurnalista d'ina gasetta turitgaisa, sto ir sin il plaz e rapportar. Tuts discurran d'in accident deplorabel.

Filli ha difficultads da crair che Padrun saja vegnida casualmain sut in auto. Ella aveva admirà la politicra curaschusa ch'era adina bain-cudeschada ed argumentava cun scharm. «Èsi propi stà in accident?» dumonda Filli. Pertge en duas emnas ha lieu a Sursass la votaziun davart in centrum da congress. Quel duess vegnir bajegia a Motta Lischana. Padrun è s'engaschada cun tutta forza encunter quest project da la firma turitgaisa «alpinainvest».

In misteri en l'uffanza

La redacziun trametta Filli en l'Engiadina per far retschertgas. La schurnalista n'è insumma betg inchantada. Ils emprims onns da sia uffanza ha ella passentà en l'Engiadina. Avant 26 onns è sia famiglia ida ad abitar a Cuira, dapi lura n'ha ella strusch pli visità ses lieu d'origin. A la staziun a Landquart traglina ella, ma prenda la finala tuttina il tren atras il Vereina en direcziun da Sursass. Là inscuntra ella svelt bleras fatschas enconuschentas. Flurina Filli vegn sissur, tge batarlims che fan la curella, ed ella chatta ora che «alpinainvest» lavura per part cun metodas dubiusas per gudagnar la votaziun davart la vendita da terren per il nov center da congress. Tuttina intervegn ella anc d'in eveniment misterius ch'è capità en sia atgna uffanza – insatge ch'ils geniturs han taschentà.

Dapli ch'in öko-crimi

Sin l'emprima egliada è «Alpenrauschen» in crimi ecologic – scrit sin basa dal clisché davart la nauscha frima ord la citad che agescha ord spira engurdia e senza resguard sin l'ambient muntagnard. Ma entras la figura da Flurina Filli obtegna l'istorgia dapli facettas. La schurnalista sa chatta en in dilemma. Na fissi betg uras da cumenzar a viver ina vita da creschids? Fissi forza bun d'avair uffants? Ad Ade-

lina, sia amia da pli baud, di Flurina: «Jau hai 36 onns e na sai anc adina betg, tge ch'jau duai far.» Lezza respunda: «Cun uffants has ti da decider bleras chaussas. Gea, ti stos savoir, tge che ti vul. E sche ti na sas betg, stos far sco sche ti savessas. Ma sche quai ha da far insatge cun esser creschì...?»

Betg sulet Flurina, era la nova pledadra dad «alpinainvest» sa tschenta sumegliantas dumondas. Per sia piazza tar la firma turitgaisa ha ella laschà ir en stalgias la relaziun cun l'ami. Ella n'è betg segira, sche quai è stà ina buna decisiun, malgrà che l'ex-ami la mulesta a moda bunamain privlusa.

Il giat sa numna Niculin

«Alpenrauschen» pon ins leger sco da baiver in grond magiel aua frestga da Lischana. I va giuadent tgunsch e dosta la sait da divertiment. A lecturs ladins porscha il cudesch sa chapescha la fascinaziun dals ligns locals. Ins po mintgamai sa dumandar, tge lieu e localitads che l'autura descriva.

Altermatt ha springì pitschnas construcziuns ladinhas en il text ch'èn sco ivettas en ina petta – raras, ma bainvegnidas. Ina da questas ivettas è er il num dal giat da la schurnalista. El sa numna Niculin.

Sabina Altermatt: Alpenrauschen.
Chasa editura Limmat. 200 paginas.
28,50 francs. Turitg, 2008.

Sabina Altermatt ed Oscar Peer prelegian en il Sphère a Turitg

Ils 4 da mars ha lieu a las 19.00 la vernissascha dad «Alpenrauschen» en il Sphère a Turitg. Planisadas èn era prelecziuns en il Grischun. Ma las datas n'èn anc betg fixadas.

In di pli tard, ils 5 da mars

è l'autur ladin *Oscar Peer* sin visita en il Sphère. El vegn a preleger ord «Das Raunen des Flusses» che la chasa editura Limmat reedescha.

L'occorrenza cumenza er a las 19.00.